



საჯარო სამართლის იურიდიული პირი

საქართველოს ევგენი ხარაძის ეროვნული ასტროფიზიკური ობსერვატორიის  
დირექტორის

ბრძანება № 03-04/13

ქ. თბილისი

24.12.2021 წ.

**ახალ კორონავირუსთან (COVID-19) დაკავშირებით ობსერვატორიაში  
შესვლისა და გადაადგილების თავისებურებების შესახებ**

საქართველოში ახალ კორონავირუსთან (COVID-19) დაკავშირებული ეპიდემიოლოგიური ვითარების გართულების გამო, რასაც თან ერთვის მსოფლიოს 90-ზე მეტ ქვეყანაში, მათ შორის საქართველოში ამ ვირუსის ახალი შტამის ე.წ. "ომიკრონის" დადასტურებული შემთხვევები, არსებითად მნიშვნელოვანია სსიპ - საქართველოს ევგენი ხარაძის ეროვნულ ასტროფიზიკური ობსერვატორიის (შემდეგში - „ობსერვატორია“) მიერ პრევენციული ღონისძიებების გატარება ვირუსის შესაძლო გავრცელების თავიდან აცილების, თანამშრომელთა ჯანმრთელობის დაცვის და უსაფრთხო სამუშაო გარემოს შენარჩუნებისათვის. საყურადღებო გარემოებაა, რომ არსებული მონაცემებით, ომიკრონის შტამი დელტა შტამთან შედარებით გაცილებით უფრო სწრაფად გადამდებია. საგრძნობლად გაზრდილია რეინფიცირების სიხშირე. ომიკრონის შემთხვევაში შემცირებულია ინკუბაციური პერიოდი.

ობსერვატორია განთავსებულია ორ ლოკაციაზე: მთა ყანობილზე (ადიგენის მუნიციპალიტეტი, დაბა აბასთუმანი) და ქ. თბილისში, მ. კოსტავას ქ. №47/57, მე-5 სართულზე. ორივე ლოკაციაზე რეგულირებულია (დირექტორის ბრძანება №03-04/09, 30.09.2021 წ.) ახალ კორონავირუსთან (COVID-19) დაკავშირებით ობსერვატორიაში საქმიანობის თავისებურებები. ანალოგიურ რეგულაციას საჭიროებს ზემოაღნიშნული ფაქტობრივი გარემოებების პირობებში ობსერვატორიის ტერიტორიაზე პირთა გადაადგილების საკითხი.

ობსერვატორია ითვალისწინებს „საქართველოში ახალი კორონავირუსის შესაძლო გავრცელების აღკვეთის ღონისძიებებისა და ახალი კორონავირუსით გამოწვეული დაავადების შემთხვევებზე ოპერატიული რეაგირების გეგმის დამტკიცების შესახებ“ საქართველოს მთავრობის 2020 წლის 28 იანვრის განკარგულებით დადგენილ (დანართი, მუხლი 10) „სამეცნიერო-კვლევით დაწესებულებებში შესაბამისი პრევენციული ღონისძიებების გატარების“ ვალდებულებას და ყოველივე ზემოაღნიშნულიდან გამომდინარე, „იზოლაციისა და კარანტინის წესების დამტკიცების შესახებ“ საქართველოს მთავრობის 2020 წლის 23 მაისის №322 დადგენილების, „სამუშაო ადგილზე ახალი კორონავირუსის (COVID-19) გავრცელების

თავიდან აცილების მიზნით რეკომენდაციების დამტკიცების თაობაზე“ საქართველოს ოკუპირებული ტერიტორიებიდან დევნილთა, შრომის, ჯანმრთელობისა და სოციალური დაცვის მინისტრის 2020 წლის 29 მაისის №01-227/ო ბრძანების, ასევე, საქართველოს განათლების, მეცნიერების, კულტურისა და სპორტის მინისტრის 2019 წლის 20 ნოემბრის №227/ნ ბრძანებით დამტკიცებული ობსერვატორიის წესდების მე-7 მუხლის მე-2 პუნქტის „ლ“, „პ“ და „ტ“ ქვეპუნქტების საფუძველზე,

### **ვ ბ რ ძ ა ნ ე ბ :**

1. დადგინდეს ახალ კორონავირუსთან (COVID-19) დაკავშირებით ობსერვატორიაში შესვლისა და გადაადგილების რეგულაციები, წინამდებარე ბრძანების დანართის შესაბამისად.
2. წინამდებარე ბრძანების მოქმედების განმავლობაში ძალაშია „სსიპ - საქართველოს ევგენი ხარაძის ეროვნული ასტროფიზიკური ობსერვატორიის ტერიტორიაზე უცხო პირთა შესვლისა და გადაადგილების პირობების დამტკიცების შესახებ“ ობსერვატორიის დირექტორის 2020 წლის 29 მაისის №03-04/03 ბრძანება და იგი მოქმედებს წინამდებარე ბრძანებით დადგენილი თავისებურებების გათვალისწინებით.
3. მხედველობაში იქნას მიღებული, რომ წინამდებარე ბრძანებით დადგენილი რეგულაციები წარმოადგენენ დროებით ღონისძებას.
4. განისაზღვრონ, შესაბამის სამუშაო ადგილებზე, ბრძანების აღსრულებაზე პასუხისმგებელ პირებად (უფლებამოსილი პირი) მთავარი ასტრონომ-მენეჯერი, ვ. ყულიჯანიშვილი (მთა ყანობილი) და ობსერვატორიის დირექტორის მოადგილე, ბ. ჩარგეიშვილი (თბილისი, მ. კოსტავას ქ. №47/50, მე-5 სართული).
5. ბრძანება ძალაშია 2021 წლის 24 დეკემბრიდან მის გაუქმებამდე.
6. განხორციელდეს ობსერვატორიაში შემსვლელ პირთა თერმოსკრინინგი.
7. დაევალოს ობსერვატორიის დირექტორის თანაშემწეს (ე. დოხნაძე) და საქმისწარმოებისა და არქივის სპეციალისტს (თ. მერაბიშვილი) წინამდებარე ბრძანების საჯაროდ გამოცხადება.
8. ბრძანება შეიძლება გასაჩივრდეს გაცნობიდან ერთი თვის ვადაში თბილისის საქალაქო სასამართლოში (მისამართი: დავით აღმაშენებლის ხეივანი, მე-12 კმ, №6).

დირექტორი



რევაზ ჭანიშვილი



**მუხლი 1. ობსერვატორიაში შესვლისა და გადაადგილების პირობები**

1. აკრძალულია ობსერვატორიის ტერიტორიაზე უცხო პირთა (პირები, რომლებიც ობსერვატორიაში არ არიან დასაქმებულნი) შესვლა და გადაადგილება.
2. ამ მუხლის პირველი პუნქტით დადგენილი შეზღუდვა არ ვრცელდება:
  - ა) ობსერვატორიასა და ამ პირს შორის გაფორმებული ხელშეკრულების/შეთანხმების შემთხვევაში, თუკი ვიზიტი განპირობებულია სამსახურებრივი გარემოებებით;
  - ბ) იმ თანამშრომლის ოჯახის წევრზე, რომელიც უკანასკნელი, მინიმუმ 1 თვის განმავლობაში იმყოფება ამ თანამშრომლის სახელზე განპიროვნებულ ბინაში (მთა ყანობილი), ვიზიტი განპირობებული საყოფაცხოვრებო დანიშნულებით.
3. თანამშრომლებს, რომელთა ძირითად სამუშაო ადგილს წარმოადგენს ობსერვატორიის თბილისის ოფისი, რეკომენდაცია ეძლევათ მაქსიმალურად თავი შეიკავონ ობსერვატორიაში (მთა ყანობილზე) ვიზიტებისგან. გამონაკლისი დაიშვება მხოლოდ ობსერვატორიის დირექტორის თანხმობით, სამსახურებრივი ან სხვა გადაუდებელი აუცილებლობის შემთხვევაში. ამისათვის თანამშრომელმა ობსერვატორიის დირექტორს უნდა წარუდგინოს მოხსენებითი ბარათი, ვიზიტის მიზეზის და ვადის მითითებით. ასეთი თანხმობის გარეშე პირი ობსერვატორიაში (მთა ყანობილზე) არ დაიშვება.
4. ამ მუხლის მე-2 პუნქტის გათვალისწინებით, ობსერვატორიის თანამშრომლის ოჯახის წევრის ამ თანამშრომელზე განპიროვნებულ ბინაში სტუმრობისთვის სავალდებულოა, შესაბამისმა თანამშრომელმა მოხსენებითი ბარათით მიმართოს დირექტორს სტუმრის (ოჯახის წევრის) ვინაობის და სტუმრობის ზუსტი ვადის მითითებით. ობსერვატორიის დირექტორის თანხმობის გარეშე პირი (ოჯახის წევრი) ობსერვატორიაში არ დაიშვება.
5. შეიზღუდოს სამსახურებრივი მივლინებები, გარდა განსაკუთრებული შემთხვევებისა, ობსერვატორიის დირექტორის გადაწყვეტილებით.
6. ობსერვატორიაში მყოფი ან ობსერვატორიის ტერიტორიაზე შესვლის სურვილის მქონე ნებისმიერი პირი ვალდებულია დაემორჩილოს ადმინისტრაციის/უფლებამოსილი პირის და ობსერვატორიის დაცვის თანამშრომლის კანონიერ მითითებებს.
7. წინამდებარე პირობების დარღვევის ფაქტის გამოვლენის შემთხვევაში, ობსერვატორია უფლებამოსილია დამრღვევი პირის მიმართ გაატაროს საქართველოს კანონმდებლობით დაშვებული ყველა საჭირო ღონისძიება, მათ შორის განახორციელოს სამართალდამცავი ორგანოების ინფორმირება.